

Presentacion di dos obra teatral dedica na respet pa mucha

ORANJESTAD(AAN)-- Dia 7 di juni proximo lo tin presentacion di dos obra teatral "Lucha di un maestra" y "Yudami" den Cas di Cultura.

Ambos obra ta skirbi pa Emira Rodriguez-Tromp, un maestra di scol trahando pa casi 40 aña den enseñansa. Den e prome obra "Lucha di un maestra", Emira ta presenta su propio lucha den bida pa muera cu door di

perseverancia, un hende por logra. For di chikito Emira of Miertje tabata tin problema na scol; sea cu conscientemente e ta wordo teni atras door di maestronan of e ta victima di termento. Siendo un mucha di Noord, di un familia humilde cu poco recurso, e tabata wordo discrimina pa su bistimento door di muchanan cu miho porvenir. Su lucha tabata largo, pero

el a logra ta bira un maestra di kleuterschool y varios di esnan cu a purba perhudic'e no a logra. Na aña 1973 el a cuminsa traha na Cayena kleuterschool na Noord y na 1995 el a bira cabesante di scol menciona.

Fuera di a sigui tur curso necesario pa su formacion como maestra, el a atende tambe e curso di CKV, cu ta dun'e e capacidad pa duna les den

formacion ariba tereno di teatro.

Pa medio di e obra Miertje kier comparti su experiencia cu otronan, specialmente e hobennan pa nan sigui lucha pa logra algo den bida, apesar di tur obstaculo cu un hende por confronta. E obra aki Miertje kier a dedica na su mama señora Stefanita, Titi Tromp, kende semper a dun'e tur apoyo pa el a logra

su metanan den bida.

E di dos obra "Yudami" ta trata di abuso di mucha, pero aki e autor ta pone enfasis ariba señalnan cu mayornan, maestronan y otronan mester tene cuenta cu nan ora ta observa cambio den actitud di un mucha of hoben. Un victima di abuso no ta papia facilmente tocante loke ta pasa cune; ta esnan rond di dje mester paga tino pa yuda e persona. E daño cu e abuso ta causa na e mucha ta cu ta kita e sonrisa for di cara di mucha, ta afecta su salud mental, tin miedo di scuridat. Adul-tonan mester ta alerta pa scucha e gritonan pa ayudo di e mucha of hoben cu ta victima di abuso.

Tur dos obra ta wordo dirigi pa Mario Flores.

E autor a invita diferente terapeuta pa ta presente dia 7 di anochi na Cas di Cultura pa contesta pregunta di publico na final di presentacion di e obranan.

Entrada lo ta solamente cinco florin pa persona y por cumpra carchi entrante di-aluna 3 di juni na oficina di UNOCA.